

Dithero tsa Tirelano mo Kutlwanong

08/2014 Thero ka letsatsi la go gopola thupiso ya Morena, e le ka 01. 01. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 79 - 74/77
2. **Thapelo:** Morena, Modimo, Rara yo o mo legodimong, re a go leboga, ka o re file Morwao yo o rategang, ka a tle go golola batho ba merafe yotlhe mo maleong otlhe. Ke gona re go kopang gore o re fe bopelotlhomogi jwa gago, re tle re dire tsotlhe tse re di dirang monongwaga ka mafoko le ka ditiro, re di dire mo leineng la ga Jesu, re tle re go galaletse ka ene ka malatsi otlhe, re nnele ruri mo tirelong ya nnete, re golele mo go yona ka malatsi otlhe, go ya re fitlhe mo bofelong mo kgalalelong ya gago, re go boke, re go obamele mo legodimong ka ene Jesu Keresete Morena Morepholosi. Amen.
3. Epistolo ka fa thulaganyong ya 2 e kwadilwe mo go Bagalata 3:26-29;

Efangele ka fa thulaganyong ya 1 e kwadilwe mo go Luka 2:21.
4. A go ipolelwe tumelo ya bokeresete!
5. Sefela sa 77 - 72/75
6. Thapelo ya mmadi wa thero.
7. **Epistolo** ka fa thulaganyong ya 6 e kwadilwe mo go Bafilipi 4:10-20, e re: "Ke itumetse thata mo Moreneng, ka jaanong lo tiile gape go ka gopola go ntlamela; le gale lo ne lo ntse lo nkgopola, mme lo sa bone phatlha. Ga ke bue jalo ka ntlha ya go tlhoka; gonne ke ithutile go itumelela tse ke leng mo go tsona. Lehuma ke a le itse, le letlotlo ke a le itse; ke itse dilo tsotlhe, le fa e le go kgora gongwe go bolawa ke tlala, le fa e le go atlanegelwa gongwe go tlhoka. Tsotlhe ke di kgona ka ene yo o nthatafatsang, e bong Keresete. Le fa go ntse jalo, lo dirile sentle, ka lo tlhakanetse tlalelo le nna. Kana le lona Bafilipi lo itse gore mo tshimologong ya Efangele, e rile ke sena go tloga kwa Maketonia, ga se ka ga nna phuthego epe e e neng ya tlhakanela lenaneo la me la madi le nna ntlheng ya go ntsha le go amogela, fa e se lona lo le losi fela. Gonne e rile ke le kwa Thesalonika, le teng lwa romela gangwe le gape tse ke neng ke di tlhoka. Ga se gore ke batla neo, mme ke batla leungo le le tla lo atelang mo lenaneong la lona. Ke amogetse tsotlhe, ke na le letlotlo, di ntlaleletse, ke amogetse tse di tswang koo go lona

mo go Epafrodito, tse e leng lonko lo lo nkgang monate le tshupelo e e natefelang e e kgatlang Modimo. Mme Modimo wa me o tla lo abela tsotlhe tse lo di tlhokang ka fa khumong ya ona mo kgalalelong e e mo go Keresete Jesu. A kgalalelo e nne ya Modimo Rraetsho go ya bosakhutleng jotlhe! Amen."

8. Thero: Barategi mo Moreneng wa rona Jesu Keresete, kereke ya bokeresete e gopola kgweriso, gongwe thupiso ya ga Morwa Modimo le Maria ka letsatsi la ntlha la ngwaga o mošwa ka fa Efangeleng ya letsatsi la kajeno e e reng: "E rile malatsi a a robedi a sena go feta a gore ngwana a rupisiwe, leina la gagwe la bidiwa JESU, le a le teilweng ke moengele, a ise a ithwalwe." Jaaka re simolola ngwaga o mošwa, re gopola kaelo ya Lefoko la Modimo le le reng: "Mme le fa e le eng se lo se dirang ka puo gongwe ka tiro, dirang tsotlhe mo leineng la Morena Jesu, lo ntse lo leboga Modimo Rara ka ene." Ka Epistolo re a gopodiwa gore "lotlhe lo bana ba Modimo ka go dumela mo go Jesu Keresete. Gonne lona lotlhe ba lo kolobeditsweng mo go Keresete, lo apere Keresete." Ke gore mafoko a a tlhometsweng letsatsi la kajeno a gatelela leina la ga Jesu Keresete gore ngwaga otlhe o o fa pele ga rona o nne ka fa tlase ga leina la ga Jesu, o okamelwe ka leina le lentle leo, le tlhaloso ya lona e e reng: Jesu ke yo o pholosang batho ba gagwe mo maleong. Le Lefoko la thero ya kajeno le tiisa kang eo, le re: **"Tsotlhe ke di kgona ka ene yo o nthatafatsang, e bong Keresete," Morena le Mopholosi wa rona.**

1. Ka ene re itshokela mo tumelong le mo tirong, le fa re atlanegelwa, gongwe re tlhoka.

2. Ka ene re kgona go tlhokomela tsa madi mo gae, le mo diphuthegong sentle.

1. Jesu Keresete, Morena le Mopholosi wa rona, o a re thatafatsa gore re nne le go itshokela mo tumelong le mo tirong, le fa re atlanegelwa, gongwe re tlhoka.. Lefoko la thero ya kajeno le re: "Ke itumetse thata mo Moreneng, ka jaanong lo tiile gape go ka gopola go ntlamela; le gale lo ne lo ntse lo nkgopola, mme lo sa bone phatlha. Ga ke bue jalo ka ntlha ya go tlhoka; gonne ke ithutile go itumelela tse ke leng mo go tsona. Lehuma ke a le itse, le letlotlo ke a le itse; ke itse dilo tsotlhe, le fa e le go kgora gongwe go bolawa ke tlala, le fa e le go atlanegelwa gongwe go tlhoka. Tsotlhe ke di kgona ka ene yo o nthatafatsang, e bong Keresete." Ka mafoko ao re a utlwa gore tumelo mo go Jesu Keresete ga e tlhophe badumedi ka fa dithotong, le e seng ka fa dithuong tsa bone. Jesu Keresete ke Morena le Mopholosi wa bone, le fa ba humile, le fa e le bahumanegi. Ke Morena le Mopholosi wa bahumanegi ba ba dumelang mo go ene. Ke Morena le Mopholosi wa bahumi ba ba dumelang mo go ene. Ke ene, le fa ba

lwala, gongwe ba tshela sentle, le fa ba tshwenyegile, le fa ba na le letlhogonolo mono mo lefatsheng. Go itsiwe gore go thata go itshokela le go tswela sentle mo tumelong, fa motho a tlhoka tsotlhe tse di tlokegang mo botshelong jwa malatsi otlhe, fa motho a le mo ditlalelong tse di maswe, le fa e le tsa malwetse, gongwe tsa khumanego, mme yo o nang le ditlalelo tse dintsi mo botshelong, yo o tlhokang tse dintsi mo lefatsheng o tla tswela, le go itshokela mo tumelong le mo tirong ya Morena, fa a gopola gore Jesu o nna le ene, o a mo rata, ke Morena le Mopholosi wa gagwe.

Gape go itsiwe gore go huma le go atlanegelwa go na le dithaelo tse dikgolo mo go ba le bantsi, mo go kalo gore Jesu a tlhagise kotsi eo ka gore "Kana go thata jang mo go ba ba nang le mahumo go ka tsena mo pusong ya Modimo!" Barutwa ba gakgamalela mafoko a gagwe ka letshogo, ba mmotsa, ba re: "Gona go ka pholosiwa mang?" Jesu a ba leba a re: "Mo bathong go a pala, mme e seng mo Modimong; gonne mo Modimong tsotlhe di ka kgonega," mo go ona go a diragala gore ba ba nang le mahumo, ba ba atlanegelwang ba gogelwe mo tumelong ka go nna ka fa tlase ga Keresete, ba tiisiwa mo tumelong, ba tsoselediwa go dirisa mahumo a bone mo tirong ya Morena. Fela jalo re utlwa ka Lefoko la thero ya kajeno gore ba kwa Filipi ba re ba itseng jaaka Lidia, le modisa wa toronko ba ba neng ba tlabologa, le go kolobediwa teng, ba thusitse moapostolo Paulo go tswaledisa tiro ya Efangele le mo mafatsheng le mo mafelong a mangwe. Ba mo romela dineo gangwe le gape. Mo lokwalong go Timotheo Paulo o a kaela a re: "Bahumi ba lefatshe leno o ba laye gore ba se ka ba ikgodisa, le e seng go ikanya khumo e e se nang tlhomamo, mme a ba solofele mo Modimong o o re abelang dilo tsotlhe ka botlalo gore di re jese monate. O be o ba laye gore ba dire molemo, ba hume ka fa ditirong tse di molemo, ba itumelele go atswa, le go abelana, ba be ba iphuthule mahumo a mothao o o siameng wa tse di tlang gore ba tle ba bone botshelo jwa nnete." Ka moo le Bafilipi ba ne ba lebogwa ka ntlha ya go thusa Paulo mo tieong ya gagwe.

Go na le kgang e nngwe e e bolelelwang mo lefokong la thero ya kajeno, re utlwa gore phuthego ya kwa Filipi e ne e tlhakanela lenaneo la gagwe la madi le ene ntlheng ya go ntsha le go amogela. Ke gore madi a thuso mo tirong ya Morena e tshwanetse go tlhokomelwa sentle ka boikanyego jo bogolo. Ba ba ntshang dikabelo ba ne ba utlwa mo go Paulo moapostolo gore madi a gorogile sentle mo go ene, a tlhokomelwa ke ene ka boikanyego jo bogolo gore a dirisiwe ka fa maikaelelong a a ntsheditsweng ona. Ka go gopola gore re tshwanetse go ikarabela fa pele ga Moatlhodi ka go tlhokomela madi otlhe a phuthego le a kereke badiredi ba Lefoko le borramatlotlo ba tla bega ka ngwaga le ngwaga sentle ka ga madi a a tsenyeng, le

madi a go duetsweng ka ona mo phuthegong, gongwe mo kerekeng gore ka go nna ka fa tlase ga Keresete re ikanyege le malebana le tsa phuthego le tsa kereke. Ka Lefoko la kajeno re a utlwa gore ka Jesu, ka go mo ikokobeletsa, ka go itshwarelela mo go ene re tla kgona go ikanyega mo go tsotlhe tse re di tshwarisitsweng, gongwe go di laolelwa gore re se nne le ditlhong fa pele ga batho, le e seng fa pele ga Modimo, mme re itumelele go ema fa pele ga Moatlhodi, le fa pele ga batho ba ba ntshetsang tiro ya Morena dikabelo tsa bone.

A ngwaga o mošwa e nne ngwaga o o molemo mo go lona gore go bonagale mo tsamaong le mo tirong ya lona gore le lona lo tla kgona go ipolela mo bofelong jwa ngwaga gore re dirile tsotlhe, re ne re kgona tsotlhe mo magaeng le mo diphuthegong, le go thatafala mo go tsona ka ene yo o re thatafatsang, e bong Jesu Keresete, Morena le Mopholosi wa rona. Amen.

9. Thapelo: Morena, Modimo, Rara yo o mo legodimong, re lebogela Lefoko la gago. Ke gona re kopang thuso mo go wena gore re dire tsotlhe mo ngwageng ono mo leineng la ga Morwao Jesu Keresete, Morena le Mopholosi wa rona, re itshware jaaka bana ba gago, le fa re atlanegelwa, le fa re tlhoka, mo letlhogonolong, le mo ditlalelong, le malebana le dikgang tsa go tlhokomela tsa madi mo gae, gongwe mo diphuthegong re dire ka go ikanyega ga bana ba gago. O re utlwe ka ntlha ya ga Jesu Keresete. Amen.

Thapelo ya Morena: Rara wa rona yo o mo legodimong ...

10. Sefela sa 78 - 73/76

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber, ka ngwaga wa 2007.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.